

# **Þjónustusamningur**

## **um kennslu og rannsóknir milli Háskólans á Bifröst og háskóla-, iðnaðar og nýsköpunarráðuneytis 2023-27**

Háskóla-, iðnaðar- og nýsköpunarráðuneyti, kt. 710122-0830, í samningi þessum nefnt ráðuneyti, og Háskólinn á Bifröst ses, kt. 550269-0239, í samningi þessum nefndur háskóli, gera með sér svofelldan samning um fjárframlög til kennslu og rannsókna á grundvelli heimildar í 40. gr. laga um opinber fjármál nr. 123/2015 og 21. gr. laga um háskóla nr. 63/2006.

### **1. Lagaheimildir og forsendur sammingsins**

- 1.1. Ráðuneytið gerir samning þennan á grundvelli heimildar í 40. gr. laga um opinber fjármál nr. 123/2015 og reglugerðar nr. 643/2018 um undirbúning, gerð og eftirfylgni samninga um framkvæmdir, rekstur og afmörkuð verkefni, nema ríkari kröfur séu gerðar í lögum nr. 63/2006 um háskóla með síðari breytingum.
- 1.2. Samningur þessi er gerður með fyrirvara um samþykki fjármála- og efnahagsráðherra skv. 1. mgr. 40. gr. laga nr. 123/2015 um opinber fjármál.
- 1.3. Háskólinn starfi í samræmi við lög um háskóla nr. 63/2006, reglur og önnur stjórnvaldsfyrirmæli sem ráðuneytið gefur út á grundvelli þeirra.
- 1.4. Háskólinn hafi viðurkenningu skv. 3. gr. laga nr. 63/2006 um háskóla.
- 1.5. Háskólinn starfi samkvæmt skipulagsskrá eða samþykktum sem ráðuneytið hefur fallist á sem eina af forsendum sammings þessa.
- 1.6. Háskólinn starfi í samræmi við lög og reglugerðir sem eiga við um starfsemi hans. Þar á meðal lög og reglugerðir um rekstur aðila sem ekki eru ríkisaðilar en veita opinbera þjónustu sem er kostuð að verulegu eða öllu leyti af framlögum ríkisins. Í fylgiskjali við samning þennan yfirlit yfir lög og reglugerðir sem kunna að eiga við.

### **2. Þjónusta, verkefni**

- 2.1. Háskólinn veiti nemendum og starfsfólki nauðsynlega þjónustu og aðbúnað sem almennt tíðkast vegna náms á sviðum félagsvísinda, meðal annars á námsbrautum í viðskiptalögfræðifræði, lögfræði, viðskiptafræði, hagfræði- heimspeki- og stjórn málafræði, menningarstjórnun og menningarfræði. Háskólinn býður einnig upp á frumgreinanám. Skrá yfir prófgráður háskólans er í fylgiskjali við samning þennan.
- 2.2. Hljóti háskólinn viðurkenningu fyrir annað nám á samningstímanum er heimilt að fella það undir samning þennan.
- 2.3. Háskólinn vinni að rannsóknum, uppbyggingu þekkingar og miðlun hennar á fræðasviðum skólans, með áherslu á nýsköpun og tengsl við atvinnulíf og samfélag.
- 2.4. Miðað er við að stærð háskólans sé á bilinu 600 til 1500 nemendur.

### **3. Réttindi og skyldur nemenda**

- 3.1. Háskólinn hafi á vefsíðu sinni greinargóðar upplýsingar um réttindi og skyldur nemenda, þar á meðal leiðbeiningar um málskotsrétt þeirra, gjaldtökureglur, fyrirkomulag náms, kennsluskra og próftökureglur.
- 3.2. Innritun nemenda er á ábyrgð háskólans sbr. VII. kafla laga nr. 63/2006 um háskóla.
- 3.3. Háskólinn tekur þátt í að samræma umsóknarferli með öðrum háskólum og ráðuneytinu og skilar skilgreindum gögnum í upplýsingagátt stjórnvalda.
- 3.4. Háskólinn haldi rafrænt nemendabókhald sem getur látið miðlægu kerfi í té upplýsingar um nemendur háskólans svo sem skráningu þeirra í námskeið og próftöku, eftir önnum.
- 3.5. Háskólinn innheimtir gjald af nemendum vegna þjónustu sem samningur þessi fjallar um og skulu forsendur gjaldtöku birtar ásamt gjaldskrá á áberandi stað á vef skólans. Hækki háskólinn gjöld umfram verðlagshækkun eða leggi á ný gjöld kynnir hann nemendum það með góðum fyrirvara og útskýrir ástæður hækkunar.

#### 4. Ábyrgð

- 4.1. Háskólinn ber ábyrgð á að þjónusta við nemendur sé fagleg og fullnægi kröfum um gæði og sé í samræmi við lög. Hann skal geta lagt fram gögn og skýrslur um innra mat, skv. 12. gr. laga nr. 63/2006 um háskóla, því til staðfestingar.
- 4.2. Háskólinn ber ábyrgð á úrlausn mála gagnvart nemendum, starfsmönnum sínum, birgjum og ráðuneytinu.
- 4.3. Háskólinn á rétt á að kaupa þjónustu af verktökum vegna afmarkaðra þátta í rekstri skólans, en slík kaup leysa hann þó ekki undan ábyrgð á framkvæmd samningsins. Skal ekki gera minni kröfur til verktaka en gerðar eru til skólans í samningi þessum.
- 4.4. Háskólanum ber að gæta þess að útgjöld séu í samræmi við tekjur og gæta ráðdeildar í rekstri. Tekjum sem verða til í tengslum við samninginn er einungis heimilt að verja til þeirrar þjónustu sem hann nær til og er heimilt að verja rekstrarafgangi til að byggja upp starfsemina.
  - 4.4.1. Háskólanum er óheimilt að:
    - 4.4.1.1. efna til óvenjulegra ráðstafana í fjármálum eða skuldbindinga sem verulegar líkur eru á að stofni framkvæmd samningsins í hættu eða bitni á námi og nemendum sem samningurinn tekur til
    - 4.4.1.2. veita önnur lán en þau sem tengjast rekstri háskólans. Lán skulu ekki vera með lakari kjörum en almennt gilda í sambærilegum viðskiptum
    - 4.4.1.3. afhenda, án skriflegs samþykkis ráðuneytisins, réttindi sín og skyldur samkvæmt samningi þessum í hendur þriðja aðila
    - 4.4.1.4. framselja greiðslur skv. samningi þessum til þriðja aðila og setja með öðrum hætti til tryggingar fjárskuldbindingu skv. 45. gr. laga um samningsveð nr. 75/1997
- 4.5. Háskólinn tryggir að allar lögboðnar tryggingar, auk nauðsynlegra skaðabóta-, rekstrar- og váttrygginga séu í gildi frá upphafi samnings og út samningstímann.

#### 5. Framlög ríkisins og fjárhagsleg samskipti

- 5.1. Rekstrarframlög ríkisins til háskólans á grundvelli samning þessa falla undir stefnu ráðherra á málefna sviði 7 Nýsköpun, rannsóknir og þekkingargreinar og 21 Háskólastig, málaflokkum 21.1 og 21.2, sbr. 20 gr. laga um opinber fjármál nr. 123/2015. Fjárhagsleg skuldbinding ríkisins verður aldrei hærri en fjárveiting í fjárlögum hvers árs á fjárlagalið skólans.
- 5.2. Framlög til samningsins eru bæði með fyrirvara um ákvörðun Alþingis um fjárveitingu í fjárlögum og um að stjórnvöld kunna að ákveða breytingar á þeim við undirbúning fjárlaga vegna aðstæðna í ríkisfjármálum á hverjum tíma. Þannig er þeim heimilt að gera kröfu um að hagrætt sé í rekstri sem samningurinn fjallar um eins og í rekstri annarra háskóla.
- 5.3. Framlag ríkisins samkvæmt samningi þessum tekur breytingum í samræmi við almenna launa- og verðlagsuppfærslu í fjárlögum eins og hjá öðrum háskólum.
- 5.4. Stjórnvöld kunna að ákveða aðhaldsaðgerðir við samþykkt fjárlaga og á háskólinn ekki kröfu á ríkissjóð eða rétt á bótum af þeim sökum. Séu gerðar almennar aðhaldskröfur af hálfu ríkisins til málaflokka 21.1 og 21.2 er heimilt að gera sömu kröfur til aðhalds í rekstri verkefna sem falla undir málaflokka 21.1 og 21.2 hjá háskólanum.
- 5.5. Verði gerð breyting á fjárheimildum til málaflokka 21.1 og 21.2 í fjárlögum geta aðilar tekið upp viðræður um aðlögun rekstrar að breyttri fjárveitingu.
- 5.6. Tillögur ráðuneytisins við undirbúning fjárlaga um árlegt rekstrarframlag til samningsins byggja á reglum sem ráðherra setur skv. 67. gr. laga um opinber fjármál nr. 123/2015, sbr. 40. gr. sömu laga og 22. gr. laga nr. 63/2006 um háskóla. Sömu viðmiðanir verða notaðar við tillögugerð vegna samnings þessa og vegna háskóla

almennt, en að öðru leyti byggjast fjárlagatillögur meðal annars á eftirfarandi forsendum:

- 5.6.1. Ársnemendafjöldi á grundvelli próftöku í mismunandi námi (verðflokkum). Miðað verður að lágmarki við 500 ársnemendur en að hámarki 900 ársnemendur.
- 5.6.2. Framlagi sem tekur mið af fjölda brautskráðra nemenda.
- 5.6.3. Framlagi til rannsókna.
- 5.6.4. Framlagi til annarra verkefna.
- 5.7. Háskólinn skilar ráðuneytinu upplýsingum vegna undirbúnings fjárlagatillagna með sama hætti og aðrir háskólar. Ráðuneytið kynnir tillögur sínar og afgreiðslu á þeim með sama hætti og fyrir öðrum háskólum.
- 5.8. Háskólinn skilar á grundvelli samnings þessa ráðuneytinu ársáætlun (fjárhagsáætlun) fyrir næsta fjárlagaár á sama hátt og opinberir háskólar gera samkvæmt 5. og 7. gr. reglugerðar nr. 218/2020 um skyldur og ábyrgð forstöðumanna ríkisaðila í A-hluta ríkissjóðs við framkvæmd fjárlaga. Jafnframt leggur hann fram bráðabirgðauppgjör fjárhagsbókhalds ársins á undan áætlunarárinu.
- 5.9. Ráðuneytið greiðir háskólanum framlag í fjárlögum í tólf jöfnum hlutum fyrsta dag hvers mánaðar.
- 5.10. Háskólinn skilar ráðuneytinu samkvæmt samningi þessum:
  - 5.10.1. Óendurskoðuðu hálfársuppgjöri fjárhagsbókhalds fyrir lok ágúst mánaðar ár hvert eða sambærilegum upplýsingum um fjárhagsstöðu skólans, ásamt upplýsingum um fjölda ársnemenda eftir verðflokkum á fyrri hluta ársins.
  - 5.10.2. Fyrir lok maímánaðar endurskoðaðan ársreikning ársins á undan sem er áritaður af löggiltum endurskoðanda sem jafnframt kannar ársnemendatölur og annað sem snýr sérstaklega að framkvæmd þessa samnings. Ársreikningurinn skal einnig sendur Fjársýslu ríkisins og Ríkisendurskoðun í samræmi við 20. gr. laga nr. 88/1997 um fjárreiður ríkisins.
- 5.11. Að fjárlagaárinu liðnu skal gera rekstrarframlag upp formlega í samræmi við almennar reglur um uppgjör fjárveitinga sem ráðuneytið setur skv. 1. mgr. 22. gr. laga um háskóla.
  - 5.11.1. Háskólinn lætur ráðuneytinu í té upplýsingar um próftöku og annað sem uppgjör verður byggt á. Skal þetta gert svo fljótt sem verða má eftir lok fjárlagaársins og getur ráðuneytið ákveðið skiladaga.
  - 5.11.2. Leiði uppgjör í ljós að háskólanum hafi verið ofgreitt framlag endurgreiðir hann umframframlagið innan tveggja mánaða frá uppgjöri, en þó eigi síðar en í júní ár hvert og er miðað við að dreifa því á þrjú næstu mánuði, nema skólinn semji við ráðuneytið um annað. Ráðuneytinu er heimilt að draga ofgreitt framlag frá fjárveitingu á uppgjorsárinu. Háskólinn á ekki rétt á hærra framlagi en veitt er til hans í fjárlögum þótt raunfjöldi ársnemenda sé umfram forsendur fjárveitinga til hans, nema um það hafi verið gert sérstakt skriflegt samkomulag í tengslum við innritun nemenda.

## 6. Bókhald og fjárreiður

- 6.1. Háskólinn skal halda fjárreiðum og reikningshaldi vegna samnings þessa aðgreindu frá öðrum fjárreiðum, bókhaldi og eignum sínum.
- 6.2. Stundi háskólinn annan rekstur en þann sem fellur undir samning þennan skal hann fylgja leiðbeiningum fjármálaráðuneytis um fjárhagslega aðgreiningu í rekstri ríkisstofnana, kveði lög, reglur eða ákvarðanir samkeppnisyfirvalda ekki á um annað.
- 6.3. Að því leyti sem háskólinn fæst við önnur verkefni en felast í framkvæmd þjónustusamnings þessa skal greina frá fjárreiðum þeirra í ársreikningi háskólans.
- 6.4. Eigi háskólinn í viðskiptum við lögaðila sem háskólinn á eignarhlut í eða er í eigu eigenda háskólans, stjórnenda hans, eða annarra fjárhagslega tengdra aðila, skulu þau fara fram á viðskiptalegum forsendum og gerð grein fyrir þeim í ársreikningi háskólans.

Jafnframt afhendir háskólinn ráðuneytinu ársreikning hlutaðeigandi lögaðila sem hann er eigandi að.

## **7. Upplýsingar, samskipti og eftirlit**

- 7.1. Ráðuneytið hefur eftirlit með framkvæmd samningsins.
- 7.2. Rektor kemur fram fyrir hönd háskólans og hefur fullt umboð til að taka allar ákvarðanir vegna þess rekstrar sem felst í umsömdu verkefni.
- 7.3. Fulltrúar ráðuneytisins og háskólans funda að lágmarki tvisvar á ári um samninginn.
- 7.4. Háskólinn skilar ráðuneytinu stuttri ársskýrslu á sama hátt og opinberum háskólum ber að gera skv. 5. - 7. gr. reglugerðar nr. 218/2020 um skyldur og ábyrgð forstöðumanna ríkisaðila í A-hluta ríkissjóðs við framkvæmd fjárlaga. Í henni skal greint frá framkvæmd samnings þessa og lykiltölum um starfsemi háskóla skv. leiðbeiningum ráðuneytisins.
- 7.5. Háskólinn skilar ráðuneytinu upplýsingum sem það kallar eftir vegna opinberrar upplýsingagjafar.
- 7.6. Háskólinn veitir Hagstofu Íslands sundurliðaðar upplýsingar úr nemendabókhaldi og öðrum skráum vegna hagtalna og skal veita Hagstofu Íslands og ráðuneytinu upplýsingar sem UNESCO, OECD, EUROSTAT og aðrir sambærilegir aðilar fara fram á. Sama gildir um upplýsingagjöf til Rannsóknamiðstöðvar Íslands um vísindarannsóknir, tækniþróun og nýsköpun og Menntasjóðs námsmanna.
- 7.7. Háskólinn afhendir ráðuneytinu gögn og veitir því upplýsingar sem það kallar eftir vegna eftirlits með rekstri háskólans, fjármálum, og ytri úttektum. Ráðuneytinu er heimilt að gera sjálft eða fela öðrum að gera athuganir og úttektir á öllum eða einstaka þáttum í starfsemi háskólans, svo sem fjármálum, stjórnsýslu og gæðum náms, kennslu og rannsókna. Í því sambandi hefur það aðgang að öllum gögnum hjá háskólanum sem máli skipta. Upplýsingagjöf ráðuneytisins um þessi gögn er háð takmörkunum skv. upplýsingalögum nr. 140/2012. Um mat og eftirlit með gæðum starfs í háskólanum fer samkvæmt IV. kafla laga um háskóla og reglum sem ráðuneytið setur.
- 7.8. Samning þennan, viðurkenningarskjöl háskólans, helstu lykiltölur, ársskýrslu og úttektarskýrslur skal birta á vef háskólans jafnóðum og þessi gögn liggja fyrir. Ráðuneytinu er heimilt að birta gögnin á vef sínum.

## **8. Vanefndir og meðferð ágreinings**

- 8.1. Háskólanum ber að tilkynna ráðuneytinu skriflega ef vafi leikur á um að hann geti uppfyllt forsendur samningsins sbr. 1. gr. eða aðrar þær skyldur sem samningur þessi kveður á um. Jafnframt skal háskólinn senda ráðuneytinu upplýsingar um til hvaða úrræða hann hyggt grípa.
- 8.2. Komi í ljós að annar hvor samningsaðila efni ekki skuldbindingar sínar samkvæmt samningnum er hinum aðilanum heimilt að krefjast úrbóta og setja hæfilega tímafresti. Skal það gert skriflega.
- 8.3. Ráðuneytinu er heimilt að draga úr eða stöðva greiðslur til háskólans bæti hann ekki úr vanefndum innan tímafrests sbr. grein 8.2. Ráðuneytið skal þó fyrst gefa hæfilegan lokafrest til úrbóta.
- 8.4. Samningsaðilar munu leitast við að jafna ágreining, ef einhver er, sín á milli.
- 8.5. Dómsmál sem rísa kann út af samningi þessum skal rekið fyrir Héraðsdómi Reykjavíkur.

## **9. Gildistími og lok samnings**

- 9.1. Samningurinn gildir frá 1. janúar 2023 til 31. desember 2027.
- 9.2. Hvor aðili um sig getur óskað eftir því að einstök ákvæði samnings þessa eða samningurinn í heild verði tekin til endurskoðunar, verði gerðar meiriháttar breytingar á löggjöf um háskóla og/eða fjárframlögum til þeirra.

- 9.3. Hvor aðili um sig getur óskað eftir því að einstök ákvæði samnings þessa eða samningurinn í heild verði tekin til endurskoðunar, enda séu færð fyrir því efnisleg rök. Endurskoðun skal þá hefjast svo fljótt sem verða má.
- 9.4. Óski annar hvor aðila eftir að segja samningnum upp skal það gert skriflega í síðasta lagi fyrir lok desember miðað við að samningur gildi til loka yfirstandandi skólaárs.
- 9.5. Háskólanum ber að tilkynna ráðuneytinu án dráttar ef til breytinga kemur á eignarhaldi háskólans og er ráðuneytinu þá heimilt að segja upp samningnum með þriggja mánaða fyrirvara.
- 9.6. Háskólinn skal tilkynna ráðuneytinu um breytingar á yfirstjórn háskólans.
- 9.7. Segi háskólinn upp samningnum gildir hann þó áfram um þá nemendur sem eru í skólanum þegar uppsögn berst þar til þeir gætu hafa lokið námi miðað við eðlilega námsframvindu, enda semjist ekki um annað við ráðuneytið.
- 9.8. Afturkalli ráðherra viðurkenningu háskólans sbr. heimild í 4. gr. laga nr. 63/2006 um háskóla vegna þess að hann uppfyllir ekki lengur skilyrði hennar eða segi ráðuneytið upp samningnum vegna alvarlegra vanefnda háskólans á honum og ágreinings sem aðilum samningsins tekst ekki að leysa úr, getur það leitt til fyrirvaralausrar riftunar samningsins og ráðuneytið tekið yfir rekstur háskólans eða flutt verkefnið sem samningur þessi fjallar um ásamt fjárveitingum þess til annars skóla enda sé hagsmunum nemenda best borgið á þann hátt að mati ráðuneytisins. Ráðuneytið getur ákveðið að húsnæði, búnaður, kerfi, skrár og skjöl í eigu háskólans eða rekstraraðila hans fylgi verkefninu þar til nemendur hafa lokið námi miðað við eðlilegan námshraða eða tekist að útvega þeim nám í öðrum skólum.
- 9.9. Samningsaðilar ákveða sameiginlega innan árs fyrir lok gildistíma samningsins hvort stefna skuli að endurnýjun hans og hefja í framhaldinu viðræður um það. Liggi á hinn bóginn ljóst fyrir af hálfu annars hvors samningsaðila að vilji sé ekki fyrir hendi til endurnýjunar samnings skal sú afstaða viðkomandi samningsaðila tilkynnt gagnaðila í samræmi við ákvæði greinar 9.4. Miðað er við að eigi síðar en hálfu ári áður en samningur rennur út hafi ráðuneytið lokið sérstakri úttekt á framkvæmd samningsins og metið forsendur fyrir áframhaldandi samningi. Á grundvelli þeirrar úttektar er tekin ákvörðun um framhald rekstrarverkefnis, sbr. 20. gr. reglugerðar um undirbúning, gerð og eftirfylgni samninga um framkvæmdir, rekstur og afmörkuð verkefni nr. 643/2018.
- 9.10. Af samningi þessum eru gerð þrjú eintök. Hvor samningsaðili heldur sínu eintaki og fjármálaráðuneytið einu.

Reykjavík, 1. júní 2023

Háskóla-, iðnaðar- og nýsköpunarráðherra  
Áslaug Arna Sigurbjörnsdóttir

f.h. Háskólans á Bifröst  
Margrét Jónsdóttir Njarðvík, rektor

Samþykki veitt, sbr. 1. mgr. 40. gr. laga nr. 123/2015.

Fjármála- og efnahagsráðherra  
Bjarni Benediktsson

*Fylgiskjöl með samningi þessum:*

1. Yfirlit yfir lög og reglugerðir sem kunna að eiga við
2. Skrá yfir prófgráður Háskólans á Bifröst
3. Áætlun um gagnaskil og samskipti samningsaðila